



KEMENTERIAN PERTANIAN DAN INDUSTRI MAKANAN
Ministry of Agriculture and Food Industries

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web : www.mafi.gov.my

KENYATAAN MEDIA

PKP TOTAL LOCKDOWN FASA PERTAMA: MAFI KOMITED PASTIKAN RANGKAIAN DAN RANTAIAN BEKALAN MAKANAN NEGARA STABIL

PUTRAJAYA, 31 Mei 2021 – Kementerian Pertanian dan Industri Makanan (MAFI) mengambil maklum keputusan kerajaan untuk melaksanakan penutupan penuh sektor ekonomi dan sosial ataupun “*total lockdown*” Fasa Pertama di seluruh negara sepanjang tempoh 14 hari bermula 1 Jun 2021 hingga 14 Jun 2021.

Walau bagaimanapun, sektor pertanian, perikanan dan penternakan serta rantaianya sebagai satu perkhidmatan perlu (essential services) akan terus dibenarkan beroperasi sepanjang masa tertakluk kepada Prosedur Operasi Standard (SOP) tertentu yang ditetapkan oleh Majlis Keselamatan Negara (MKN).

YB Menteri Pertanian dan Industri Makanan Datuk Seri Dr Ronald Kiandee berkata langkah susulan dan persediaan akan dilaksanakan dalam memastikan semua rangkaian dan rantaian dalam aktiviti sektor pertanian dan industri makanan termasuk ekosistemnya tidak akan terjejas sepanjang pelaksanaan PKP “*total lockdown*” Fasa Pertama ini bagi memastikan kelangsungan rantaian bekalan makanan dan jaminan sekuriti makanan negara.

MAFI amat komited untuk memastikan rangkaian dan rantaian bekalan makanan di Malaysia kekal berada di tahap yang stabil, mencukupi dan terkawal selain akses yang sentiasa tersedia kepada orang ramai.

Untuk makluman, MAFI menganggarkan keperluan sebanyak 100,000 tan metrik sehingga 150,000 tan metrik beras dalam tempoh 14 hari pelaksanaan ‘*total lockdown*’ dimana jumlah ini termasuk andaian sekiranya berlaku pembelian panik oleh orang ramai.

Bekalan keperluan ini dapat ditampung berdasarkan kedudukan stok beras semasa sebanyak 764,000 tan metrik pada masa ini yang berada diperingkat pengilang, pemborong dan peruncit.

Bagi memastikan bekalan dan pengeluaran beras berterusan dan tidak terganggu, MAFI akan memastikan proses penanaman padi dan juga operasi kilang padi dan beras dapat beroperasi pada kadar yang dibenarkan mengikut SOP yang ditetapkan oleh MKN.

Ini termasuklah kebenaran pengedaran input pertanian seperti baja, benih padi dan penggunaan jentuai di sepanjang tempoh tersebut. Penanaman dan penuaian padi pada masa ini sedang berjalan di beberapa negeri seperti di Pulau Pinang, Perak, Pahang, Kelantan dan Terengganu.

Pengedaran beras diperingkat pemborong dan peruncit juga dibenarkan untuk beroperasi mengikut SOP yang ditetapkan oleh MKN bagi memastikan setiap pelusuk daerah dan kawasan tidak akan terjejas bekalan makanan utama.

Kedudukan stok semasa bekalan ikan negara pula berjumlah 185,000 tan metrik sebulan berbanding keperluan semasa sebanyak 155,000 tan metrik sebulan.

Sejumlah 89 Pasar Nelayan dan 33 buah Pusat Pengumpulan dan Pengedaran Ikan (CCDC) masih beroperasi di seluruh negara sepanjang tempoh PKP "*total lockdown*" Fasa Pertama ini, manakala di kawasan Perintah Kawalan Pergerakan Diperketatkan (PKPD) adalah tertakluk kepada arahan pihak berkuasa tempatan dan SOP yang ditetapkan oleh MKN.

Berasaskan data bekalan komoditi ternakan dijangkakan bekalan daging, ayam, telur dan susu juga adalah mencukupi untuk keperluan negara.

Untuk bulan Jun ini, bekalan daging lembu dan kerbau adalah dianggarkan sebanyak 22,590.58 tan metrik manakala bekalan daging ayam adalah sebanyak 125,067.61 tan metrik. Bekalan telur ayam untuk bulan Jun ini pula dianggarkan sebanyak 976,847,250 biji dan bekalan susu segar adalah sebanyak 4,147,608.10 liter.

Bagi menjamin akses orang ramai terhadap keperluan bekalan makanan, MAFI melalui FAMA telah membuka 43 lokasi Pasar Segar Terkawal (PST) di seluruh negara yang terdiri dari 24 buah Pasar Tani Kekal, 3 buah MyFarm Outlet, 14 buah Pusat Operasi FAMA dan 2 buah Agrobazaar berbanding 63 lokasi yang telah dibuka semasa PKP 1.0 yang lalu.

Pengurangan ini adalah disebabkan oleh pelaksanaan SOP yang diperketatkan oleh MKN untuk menangani penularan gelombang ketiga Covid-19 yang kian meningkat.

Sehubungan itu, bagi melancarkan semua aktiviti, pemain industri dan para usahawan yang terlibat dalam rangkaian dan rantai sektor pertanian, perikanan, penternakan dan perladangan juga dinasihatkan untuk berhubung dengan Jabatan/Agensi di bawah MAFI yang terdekat untuk mendapatkan surat pengesahan, selain perlu mematuhi semua SOP ditetapkan oleh kerajaan bagi membendung penularan Covid-19.

MAFI juga ingin menegaskan akan terus komited dalam membantu para pemain industri dan juga golongan petani, penternak dan nelayan dalam memastikan sektor pertanian dan industri makanan tidak akan terjejas berikutan penutupan sektor ekonomi dan sosial.

MAFI akan terus memastikan pematuhan penuh terhadap aspek keselamatan dan SOP yang ketat demi membendung penularan Covid-19 selain melindungi setiap nyawa yang amat bernilai.

Dr Ronald juga menyeru semua pengusaha agromakanan termasuk petani, penternak dan nelayan sentiasa patuh kepada SOP ditetapkan oleh MKN dan menjaga kesihatan diri sepanjang masa dengan mengutamakan pemakaian pelitup muka (face mask), penjarakan sosial dan membasuh tangan menggunakan sabun atau hand sanitizer.

Kementerian ingin menasihati orang ramai supaya tidak membuat *panic-buying* dan *stock-piling* bahan makanan secara berlebihan yang boleh mengakibatkan keadaan di mana terdapat ketidaksamarataan dari segi akses bekalan makanan kepada orang ramai.

Orang ramai boleh menghubungi Bilik Gerakan MAFI ditalian 03 88701664/1491 atau email bilikgerakan@mafi.gov.my untuk mendapatkan sebarang maklumat atau penjelasan berkaitan sektor pertanian dan industri makanan.

Selain itu orang ramai juga boleh mengakses laman web MAFI iaitu www.mafi.gov.my untuk mendapatkan maklumat berkaitan aktiviti, pengoperasian dan SOP PKP “*total lockdown*” Fasa Pertama ini.

MAFI akan terus bekerjasama dengan Kementerian Perdagangan Dalam Negeri dan Hal Ehwal Pengguna (KPDNHEP) serta kementerian yang lain dalam memastikan bekalan makanan negara terus berada dalam tahap yang stabil, mencukupi dan terkawal sepanjang masa.

Disediakan oleh:

Unit Komunikasi Korporat

Kementerian Pertanian dan Industri Makanan

31 MEI 2021